

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

22 Juin 2018  
(07 Shawwal 1439 AH)

**Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Messages Divines 18 à 19 Juin 2018 ».**

Azordi mo Khutba Jummah ti pour lors bane croyants ki fine profite pleinement mois Ramadan et ki mo souhaiter Allah (swt) accepter tous zot bane zéfforts le jour ki zot pour présente devant Li. *Insha-Allah. Alhamdulillah* nous bane frères et sœurs, après *Eid-ul-Fitr*, beaucoup pé garde les 6 *Roza Nafils*, *Alhamdulillah*. Ki Allah (swt) récompense zot pour tous zot l'amour ki zot ena pour Li seul. *Ameen*.

**Mo bizin faire mo bane très chers disciples du Jamaat Ul Sahih Al Islam à travers le monde entier part ki séki mo pour présenter devant zot aujourd'hui c'est pas le sujet de mo Khutba Jummah aujourd'hui, mais étant donné ki c'est ene message ki vine directement de côté d'Allah (swt), li mo devoir comme le Khalifatullah de sa siècle là pour donne zot sa message là.**

Lundi le 18 Juin après *Salaat-ul-Esha* et après ki mo fine fini lire le Quran Shariff, mo ti pé lire Surah Al-Imran, Chapitre 3, et après bane Attributs d'Allah, Rabbanas et plusieurs *duahs*, et à la fin kan mo fine monte lor lili pour dormi vers 11.20 le soir, mo pas senti moi bien du tout. Toute la famille fine fini dormi, et moi mo pas

pé senti moi bien et mo ti pé transpire gros, avec l'angoisse et palpitation du cœur, et tremblement. Et dans sa même situation là mo senti ene poids bien lourd ki pose lors mo la tête et mo entende ene la voix très fin et bien joli. Tout de suite mo fine comprend c'est la révélation ki pé déssane. **Mo tende :**

**Aouzoubillahé minash Shaytane-ir-Rajeem, Bismillah-ir-Rahman-ir-Rahim. Yaaa 'ayyuhan-naasu 'inna wa' dallaahi haqqun - falaa taghurran-nakumul-hayaatud-dunyaa: wa laa yaghurrannakum billaahil Gharuur.** (Li trouve dans Surah Fatir, Chapitre 35).

**So Traduction:** *Ô bane dimounes, en vérité, promesse Allah li vrai. Na pas laisse la vie sa le monde là trompe zot et pas laisse le grand trompeur (Satan) trompe ou lor Allah.*

Après sa verset là bane messages déssane, kot Allah (swt) pé informe moi plusieurs zaffaires.

*« Ô Munir Ahmad Azim, Mo fine faire ene grand faveur lor toi, kot Mo fine donne toi le titre de Amir-oul-Momeneen et après mo fine donne toi le titre de Mohyuddin (Reviver of Faith of this era) kot beaucoup ti pose zot la main dans to la main - c'est pas to la main mais c'est la main d'Allah – et faire zot tous unir lor l'unicité d'Allah. En d'autres mots kot zot tous fine prend le Bai'at dans to la main et fine croire dans toi comme ene Mohyuddin de sa l'époque là.*

*Ô Munir Ahmad Azim, guette couma to Rab Li faire So travail, sans ki l'homme comprend. Zot tous pé attendre ene l'autre revendication, kan Allah (swt) de So Grandeur fine fini manifester Li dès le début avec le titre de Amir-oul-Momeneen et après Mohyuddin et après Mo fine donne toi et révèle toi plusieurs titres couma Musli-oud-din, Muslih Maoud et jusqu'à Mo élève toi comme Khalifatullah et après Khalifatullah, Massih Maoud, Mujaddid, Nabiullah, et Rassoollullah.*

*L'homme pé faire même so plan et Allah aussi faire So plan et Allah So plan li meilleur ki tous. Sa bane là zot dans ene tourment, ki zot pas conner ki pé arriver et Allah pé amène So serviteur et bane ki suivre li lor ene haut sommet. Céki to Rab fine décrété personne pas capave barré. Sans aucaine zefforts de l'homme, ou Seigneur pour faire le monde conne le Jamaat Ul Sahih Al Islam et la Manifestation Divine, Insha-Allah. Pas perdi l'espoir, car Allah avec bane ki ena patience. »*

En passant mo pé dire zot, et sa li pas dans le message ki mo fine recevoir de côté d'Allah, mais seulement pour faire tous mo bane disciples comprendre. Azordi jour le travail du Jamaat Ul Sahih Al Islam pé pli grandi par la grâce d'Allah à travers le monde entier. Si ou conné à travers le monde combien dimounes envoie bane emails, dépi messages lor mo portable, avec bane questions et réponses lors Whats App. Ena beaucoup mo bane disciples envoie moi emails, messages lor portable et ena téléphone moi aussi. Pas bizin zot perdi l'espoir et décourager. Mo pé lire tous zot bane emails et messages etc., mais mo pou prend ene ti peu létemps pour réponde zot. Quant à zot, contigne envoie zot bane emails et messages etc. Mo pé lire tous sa là et faire *duahs* aussi. Tellement ena ene révolution spirituelle extraordinaire kot beaucoup bane les autres peuples, nous bane les autres frères et sœurs musulmans pé soif sa trésor spirituelle là. Mo pé bizin réponde zot emails, messages et questions lors Whats App etc. Et zot mo bane disciples essaye comprendre moi comme ene Messenger d'Allah, ki mo fine vini pour toute l'humanité et mo message li pour toute l'humanité.

Alors pas décourager, ni encolère, ni arrête envoie zot messages ou emails. Mo rassure zot tous ki mo lire et mo pou réponde tous zot bane emails ene seul coup. Faudé pas penser pour ene seconde ki zot Huzur pé mette zot bane messages ou emails de côté, pas pé prend compte. Au contraire, faire beaucoup *duahs* ki Allah (swt) reste content et satisfait avec zot, ki zot pas perdi sa bénédiction là. Sa c'est mo bane propre mots ki mo pé adresse zot lor sa sujet là.

### **Maintenant le message d'Allah continuer :**

*« Allah fine donne toi Ô Khalifatullah et to bane disciples l'occasion pour faire kitchose pour faire Moi (Allah) plaisir, et azordi bane ignorants pé traite toi et to bane disciples avec mépris. Zot pé passe par ene période bien difficile ; dimounes pé harcèle zot de toutes sortes façons. Et zot pé supporte [c'est-à-dire, pé passe par bane] blâmes, boycottte, faire casse relation familiale, pé faire zenfants séparer avec zot parent, pé créer la haine dans le cœur ou propre disang contre zot à cause fine accepter Manifestation Divine, croire dans ene Khalifatullah.*

*Sa bane ki pé faire sa là, dans zot croyance, zot croire, zot pé rende ene grand service à l'Islam ou ena pé faire sa pour faire zot bane Amirs, Mullahs ou le Khalifa plaisir. Donc, zot pé faire sa qualité traitement là avec zot, et le ciel aussi pé tester zot pour ki capave dire ki pé tester zot dans toute sortes façons. Est-ce ki zot pour*

*dire ki zot fine croire dans Allah So Khalifa, révélation, Manifestation Divine sans ki Moi (Allah) aussi Mo pas pou tester zot ?*

*Si ou la foi ferme, solide couma ene béton, jamais pas penser pour ene moment ki zot pas pour réussi. Place zot confiance dans parole Allah et pas peur. Mazine bien ki li essentiel ki bane épreuves vini temps en temps pour ki ou Rab capave distinguer ki sanlà vrai dans so croyance en céki concerne la Manifestation Divine et ki sanlà ki pé amène rôle hypocrite, pé déguise en bon dimoune et pé prend tous l'information du Jamaat Ul Sahih Al Islam et donne bane l'ennemies pour créer désordre. Ou pou trouve ene bane hypocrites ki cherche gagne ou confiance et confiance l'autre Jamaat là aussi. Allah fine fer zot retourne à zot hypocrisie à cause zot actions.*

*Faire bien attention avec bane ki ene temps zot ici et après zot l'autre côté et pé cherche toute sorte qualité négatif entre Nous bane membres ou entre 2 Amirs pour alle créer désordre pour dire ki ene fausse Jamaat sa. [Sa kalité hypocrite là] Li là pou rode tout ti lie et tous les temps li ena toute sortes qualité questions et doutes dans so la tête. C'est ene dimoune ki fine tomber complètement. Li fine amène li-même vers so propre destruction kot li pas fine faire ni Allah et ni le Khalifatullah du tort et so mauvais ki li fine faire pour amène li finalement dans le feu de l'enfer. »*

Message continuer kot Allah (swt) déssane bane mots avec ene la force ki ou trembler avec frayeur kot Li dire :

*« Ene dimoune ki témoigne signes d'Allah, après tourne le dos avec arrogance, so punition deux fois plus ki ene idolâtre. Bane ki tini ferme avec Allah et So Envoyé, épreuve lor épreuve vine lor zot, zot pas perdi patience et reste ferme dans zot croyance arrive céki arrive. C'est zot ki pour sorti victorieux à la fin et bane la portes de grâces et bénédictions pour ouvert en grand pour recevoir zot. Allah promette ki Li pas pou laisse zot tomber. Céki zot pé passé, bane épreuves ki zot pé passé, prend sa comme ene bénédiction de la part d'Allah. Chaque l'époque fine mentionne bane dimounes ki fine subir bane épreuves et malgré zot fine mort lor sa la terre là, sa qualité dimounes là zot vivants jusqu'à zordi et bane croyants prend zot noms avec beaucoup de respect et jusqu'au Jour du Jugement dernier zot pour honorer.*

*Dans sa l'époque là aussi bizin bane dimounes comme sa ki zot noms gravés en lettres d'or kan épreuves vini. Donc, si ou Rab fine choisir ou, accueillir sa avec la joie.*

*Tous bane titres – Khalifatullah, Mujaddid, Massih Maoud, Nabiullah, Rassoollullah etc. – c'est Moi ki fine donne Mo Serviteur Choisi sa et c'est à Mo bien-aimé serviteur ki mo fine donne sa bane titres là.*

*Dire à tous bane membres du Jamaat Ul Sahih Al Islam à travers le monde ki Mo avec zot et reste sincère et fidèle avec Mo bane signes. Pas vine ingrats, ni vine hypocrites, ou sois avec persécutions zot tourne le dos avec Mo bane signes. Faire zot conner ki Mo punition li bien sévère, plisse sévère ki pou ene Kafir.*

*Ô, zot bane perles ki trouve lor sa la terre là, zot ki chanceux, ki pé vivre dans ene l'époque kot zot Rab pé causer à travers So Serviteur Choisi, zot couma bane perles devant lizié cochons, parce ki cochons pas conne valeur perles. Mais devant zot Rab zot pé briller et kot zot pé aller Allah So l'ombrage lors zot. Cherche zot Rab, dans sa le monde là et dans Aakhérat aussi. Meilleur parmi zot, c'est celui ki prend patience et gagne la crainte de so Seigneur seulement. Nettoye zot les cœurs, poli zot les cœurs couma ene miroir, l'heure là zot pour trouve la lumière d'Allah refléter dans zot les cœurs, et l'heure là sa qualité les cœurs là pas pou attacher avec sa le monde matériel là, Insha-Allah.*

*Mo l'amour pou zot li bien grand, mais faudé zot aussi zot cultive Mo l'amour dans zot les cœurs. À ce moment là, zot pou senti Moi bien près avec zot, pli près ki zot l'artère. Guette zot même, essaye comprend zot même, l'heure là zot pou trouve Moi, parcéki zot pé trop attirer avec sa le monde matériel là, et sa pé faire ene voile lors zot lizié, ki sa pé empêche zot trouve Moi. Si zot réussi tire sa voile là ou si zot réussi avance sa rideau là, bé certainement zot pou trouve Moi bien près avec zot. Mais zot pas pé faire assez zéfforts pour retire sa voile là. Mo là, couma sa la fontaine là, nek ena pour faire zéfforts, l'heure là ki de l'eau là pou couler et ou prend li, pour passe ou la soif. Gagne la crainte d'Allah et l'obéissance d'Allah. Ou pou ena ene la vie de paix et de bénédictions.*

*Chacun parmi zot vine humble, ena beaucoup de humilité et pas espionner, ni mette bane doutes dans zot la tête. Parcéki doute faire ou gagne la haine dans ou lé cœur et li amène ou vers la destruction. Kan ene dimoune pas conne ene kitchose de vérité, alors c'est le doute ki vine dans so l'esprit. Doute c'est ene*

maladie bien grave, ki brûle ou bane bonne actions et li amène ou dans du feu l'enfer. Doute li détruire ou Imaan, détruire ménage, détruire ene famille, détruire ene communauté et li créer désordre et vengeance.

Ô Mo Serviteur Choisi, dire à to bane disciples sincères, reste loin avec doute et chacun parmi zot reste bien solidaire. Si ene parmi zot pé souffert, zot tous bizin souffert pareil et bizin faire beaucoup duahs pou li. Jamaat Ul Sahih Al Islam ene famille kot zot tous bizin reste couma ene seul famille. Faudé pas ena division parmi zot, ou sois ene jaloux l'autre, pas cause avec so frère ou sœur de même Jamaat. Mo Khalifatullah parmi zot pour faire zot resserre zot lien d'amitié et d'amour couma ene colonne béton. Pas penser ki zot très peu. Zot nombres pou augmenter. Faudé pas ena sa qualité pensée là – Place zot confiance dans zot Rab et à partir zordi grandi zot la caze. Bane jours pé vini kot dimounes pour sorti loin loin pou vine vers zot et zot travaille c'est pour faire dimounes conne le Créateur de l'Univers et So Khalifatullah de sa siècle là. Mo donne zot sa garantie là, ki si chacun parmi zot ena ene le cœur pure et li tourne li vers Moi avec Taqwa, alors définitivement li pou trouve Moi et kot li pou aller Mo l'ombrage pour couvert li et personne pas pour capave touche li.

Le Khalifatullah pou donne ou le message d'Allah. So travail c'est pou amène ou pli près avec Allah, avant ou quitte sa le monde là et pour ki Allah pardonne ou. So travail c'est pas pour mette personne dehors dans le Jamaat Ul Sahih Al Islam. Dans le Jamaat Ul Sahih Al Islam c'est Allah ki éloigne bane hypocrites, malfaiteurs, ki faire toutes sortes kalité désordres et créer la haine et doute dans l'esprit les autres. C'est Allah même ki faire sa bane qualités dimounes là sorti et tire zot parmi bane pieux, bane chercheurs de vérité. Allah même ki sanctionne zot ; sa pli grave encore kot Allah même lor sa duniya là Li fine sanctionne quelqu'un et tire li dans la Manifestation Divine et éloigne li avec So Khalifatullah.

Ô zot bane élus d'Allah ki fine accepter Mo Khalifatullah, reste ferme dans le chemin d'Allah. Pas prend tracas de bane épreuves, car Allah même Li donne épreuves à So bane serviteurs choisi et Li même ki enlève bane épreuves. Épreuves c'est ene moyen pour faire tourne plisse vers ou Rab. Allah jaloux de So bane serviteurs. C'est pour sa ki Li donne bane épreuves pour ki ou pas oublier Li. Donc adore seulement Moi et tourne seulement vers Moi-même. »

Ene nuite sa bane messages là fine déssane jusqu'à Tahajjud, et Mardi le 19 Juin vers 10.35am encore ene série de bane messages fine déssane. Faire *duahs* ki *Insha-Allah*, mo capave donne zot sa bane messages là.

Sur ce, mo termine mo Khutba Jummah d'aujourd'hui avec sa bane messages divine là. Ki Allah aide tous mo bane disciples pou mette en pratique tous bane l'instruction de zot Rab, et reste ferme et prend patience dans le chemin d'Allah afin ki *Insha-Allah*, zot gagne Allah même comme zot récompense. *Ameen, Summa, Ameen.*

Ki Allah protège zot les cœurs et pas fer zot les cœurs et l'âmes mort spirituellement. Ki Allah protège zot de l'hypocrisie et désespoir ki capave faire fracas à zot la foi, et ki Allah tourne zot les cœurs tous les temps pou prend toujours le droit chemin et suive caravane d'Allah sous la forme du Jamaat Ul Sahih Al Islam et zot adhérence à sa humble serviteur là, So Khalifatullah de sa siècle là. *Insha-Allah, Ameen.*

En vérité, c'est uni ki nous pou capave fer le travail d'Allah dans la façon la plus parfaite. Division créer doute, la haine et jalousie. Alor gagne la crainte d'Allah et resserre les liens de fraternité avec zot bane frères et sœurs de même la foi et Jamaat ki ou, afin ki l'Islam retrouve so l'unité, et ki *Insha-Allah*, tous ensemble nous capave marche vers la victoire sous le regard de miséricorde d'Allah. *Insha-Allah, Ameen. Summa Ameen, Ya Rabbal Aalameen.*